



**Il chantun Grischun ha, sco ils ulteriurs chantuns dal concordat da la Svizra orientala davart l'execuziun da chastis e da mesiras, dapi onns ina pratica d'execuziun restrictiva.**

KEYSTONE

# Pratica d'execuziun da chastis restrictiva en il chantun Grischun

■ (cc) Il chantun Grischun na vesa nagin motiv da midar sia atgna pratica executiva en l'execuziun giudiziala suenter il mazzament a Genevra. Il sistem vertent è sa cumprovà. Il chantun Grischun ha, sco ils ulteriurs chantuns dal concordat da la Svizra orientala davart l'execuziun da chastis e da mesiras, dapi onns ina pratica d'execuziun restrictiva. Il cusseglier guvernativ *Christian Rathgeb* ch'è vicepresidente dal concordat punctuescha che questa pratica vegnia manada vinavant consequentamain. Sa basond sin las directivas da la cummissiun d'execuziun da chastis da la Svizra orientala ston schlucadas da l'execuziun tar delinquents potenzialmain privlus vegnir examinadas detagliadamain e concedidas en moda fitg restrictiva. L'execuziun da l'internament sto vegnir concepida uschia che la segirezza publica è garantida. En quest connex ha la segirezza prioritad avant las stentas da reintegrazion. En l'internament èn pussaivlas schlucadas da l'execuziun mo en cas excepziunals. En spezial na vegnan da princip concedidas naginas schlucadas da l'execuziun betg ac-

cumpagnadas. En il Grischun na datti betg terapias da chavaltgar u chaussas sumegliantas per delinquents.

## Nagin basegn d'agir en il chantun Grischun

Però na dastga er betg vegnir esclusa la ristga en il chantun Grischun. Suenter ils eveniments tragicis ils pli actuals en la Svizra franzosa èn vegnids examinads ils cas en il Grischun areguard ristgas cumparegliablas. En quest connex poi vegnir constatà ch'i na dat – abstrahà da las relaziuns da spazi stretgas – actualmain nagin basegn d'agir tar l'execuziun da chastis en ils stabiliments per l'execuziun giudiziala.

## Critica envers il tribunal federal

Il chantun Grischun è actualmain competent d'exequir dus internaments e 18 sentenzias da delinquents potenzialmain privlus. In da quests dus internaments sto però proximamain vegnir abolì sin fundament d'ina decisiun dal tribunal federal, cuntrari a las decisiuns ed a las propostas da las instanzas chantunalas. Per cusseglier guvernativ *Christian Rathgeb* n'è la sentenza betg cha-

pibla; el spetga er da vart da las dretgiras in tractament pli sever da tals delinquents. L'um pertutgà da 76 onns, ch'è vegnì sentenzià pervia da plirs acts sexuals cun uffants, è vegnì relaschà cundiziunadamain dal tribunal federal. El vegn collocà cun in'assistenza da reabilitaziun e cun directivas rigurusas en ina chasa dad umens en in auter chantun dal concordat da la Svizra orientala davart l'execuziun da chastis e da mesiras. La persuna internada restanta è pervia d'in mazzament gia dapi blers onns en ina partiziun serrada d'in center da mesiras e na survegn naginas schlucadas da l'execuziun senza accumpagnament. In ulteriur delinquent ch'era internà dapi blers onns è mort l'onn 2011 en il stabiliment d'execuziun.

Dal puntg da vista dal chantun Grischun n'èsi betg necessari da relaschar ina lescha federala davart l'execuziun penala ubain da reunir ils concordats d'execuziun da chastis e da mesiras. La pratica executiva dal Grischun ed il concordat dals chantuns da la Svizra orientala davart l'execuziun da chastis e da mesiras èn sa cumprovads, uschia ch'i na dat nagin basegn d'agir.